

Visoki predstavnik na sastancima u New Yorku razgovarao o evropeizaciji i reorganizaciji međunarodnih civilnih organizacija

Visoki predstavnik Wolfgang Petritsch je u utorak nastavio seriju sastanaka sa visokom dužnosnicima u New Yorku, koji su za svrhu imali produženje angažmana stranih vlada i međunarodnih agencija u mirovnom procesu u Bosni i Hercegovini.

Visoki predstavnik se u utorak ujutro sastao sa ministrom vanjskih poslova Španije Josepom Piqueom. Ovaj sastanak je bio posebno važan za visokog predstavnika pošto je Španija dugoročni partner u mirovnom procesu u BiH, kao i zbog činjenice da će Španija u januaru sljedeće godine preuzeti od Belgije predsjedavanje Evropskom Unijom. Gosp. Pique je izrazio veliki interes za napredak postignut u provedbi mira u BiH.

Visoki predstavnik je opisao trenutnu situaciju, naglašavajući napredak koji je postignut u razvijanju konstruktivnog partnerskog odnosa između OHR-a i političkog vodstva države i entiteta. On je takođe skrenuo pažnju na prekretnicu do koje je došlo u procesu povratka u 2000. godini, a sa kojom se nastavilo i u ovoj godini.

Visoki predstavnik je izložio mjere koje su poduzete kako bi se pružio otpor hrvatskom separatizmu i istovremeno zaštitili interesi Hrvata iz BiH kao brojčano najmanjeg konstitutivnog

naroda Bosne i Hercegovine. Visoki predstavnik je takođe izrazio svoju zabrinutost zbog upornog opstrukcionizma srpskih predstavnika u državnim institucijama BiH. On je ponovio svoje uvjerenje da će hapšenje i predaja Hagu Radovana Karadžića i Ratka Mladića konačno omogućiti Republici Srpskoj i BiH u cjelini da se odlučno i pozitivno krene naprijed. Dodao je da su političke promjene do kojih je došlo u toku prošle godine u Hrvatskoj i Jugoslaviji učinile vjerovatnijim takav razvoj situacije i druga pozitivna kretanja u BiH.

Gosp. Pique je pohvalio visokog predstavnika na hrabrim odlukama koje je donio kako bi BiH približio prema modernom političkom ambijentu konsistentnom sa evropskim normama. Gosp. Pique je izrazio svoju punu podršku ovim naporima, kao i visokom predstavniku lično.

Visoki predstavnik je izrazio zadovoljstvo činjenicom da je članstvo BiH u Vijeću Evrope zakazano za početak iduće godine, iako je dodao da je zabrinut sporim ispunjavanjem uslova iz smjernica Evropske Unije (EU Road Map), posebno zbog toga što se na budućnost BiH sada univerzalno gleda u kontekstu integracije sa Evropom. Visoki predstavnik je zamolio gosp. Piquea da podrži proces evropeizacije BiH tokom predsjedavanja Španije Evropskom Unijom.

Visoki predstavnik se u utorak popodne sastao sa šefom Razvojnog programa UN-a (UNDP) Markom Mallochom Brownom. Visoki predstavnik je obavjestio gosp. Browna o naporima međunarodne zajednice da, pod vodstvom OHR-a poveća efikasnost svoga djelovanja u BiH putem poboljšane koordinacije i sistematske reorganizacije. Razgovaralo se o načinu na koji se mogu optimizirati aktivnosti UNDP-a u BiH, posebno u oblastima kao što su ljudska prava, povratak izbjeglica, vladavina prava, obrazovanje i izgradnja građanskog društva. Složili su se da postoji potreba da se osigura brzo i efikasno postavljanje ekonomske i socijalne infrastrukture za

samoodrživi povratak izbjeglica i raseljenih lica.

Visoki predstavnik je pohvalio UNDP na njegovom aktivnom učešću u planu aktivnosti za Srebrenicu i podršci reformi državne službe u BiH.

U utorak naveče Visoki predstavnik je otputovao u Washington, gdje će se sastati sa visokim zvaničnicima vlade SAD, uključujući i zamjenika državnog sekretara Richarda Armitagea, kao i sa predstavnicima Svjetske banke i Međunarodnog monetarnog fonda.